



Ronald Koeman-i Netherlands coach mapa toktsüogo

Taoba küm Trump-i crypto businesses nungi sen \$1.2bn ajangzük

VOL. XXIII ISSUE NO. 259 (ADOK 259) DIMAPUR YANGTEPNÜ (THURSDAY) CHITENI (JULY) 02, 2026

₹ 5.00

Hmar Inpui-i Kuki-Zo Council nungi pilar

Imphal, July 1, 2026 (Agencies): Hmar nunger atema tematiba telok Hmar Inpui-i Kuki-Zo Council den pilaba osang metetdaksüogo. April 16, 2026 nü 15 buba General Assembly alidang bangzüng ka renemba nung ajemdaker iba lemtet agiba parnoki ashi.

Iba onük asoshi kanga junga lemsateptsü aser shisadangba sülen telemtetba agiogo ta Rengkai, Churachandpur nung General Headquarters ajanga sangdong ka nung ashi.

Hmar Inpui ya Hmar nunger atema tematiba telok aser iba telok indang headquarter ya Manipur kübok Churachandpur nung lir.

Manipur nung Zohnathlak kin ajak tenüng nung yimtenren

sabang ka asütsü ta teimla nung Kuki-Zo Council nung aden ta Hmar Inpui-i ashi.

Ajisüaka, KZC nükjidong aser inyaksangshi meyipa reprangdang Zohnathlak kin ajak atema meinyakba aser tenzükdang ayuba tangatetbatem nungi pilaa aoba ajitetogo. Iba jagi KZC-i tetenzük nung mangdang ayuba common platform bener marutet ta Hmar Inpui-isa metetdaksü.

Onoki KZC nung medenaka tarutsü nung ajak adenba political platform ka tentettsü lenmang bushitepa aotsü mulunga lir ta Hmar Inpui-isa shisem.

Iba sangdong nung Hmar Inpui General Secretary Immanuel Pulamte aser President Rev. Ros Infimate nati sign süa lir.

Kamjong nung ki 15 rongdoktsü Tangkhul nunger yimtsüing ka amak

Imphal, July 1, 2026 (Agencies): Kamjong district kübok Phaimol Kuki yimtsüing nung mejangjatetba nisung kari ki 15 mitsü küma rongdoktsü aser iba tayang küpzüka Tangkhul yimtsüing ka amak saka security forces-i noktangtetogo.

Tanü 12:30 ako meta Indo-Myanmar Border Pillar No. 113 anasa lendong atalok ta osang angazüker.

Tensa majungba agi Phaimol nung alirtemi Aishi village nung jenoka lir. Idakji 11 Assam Rifles camp ka amenoka lir. Iba jagi ki rongdoktsüdang nisung asüba mesüra yiruyibong asüba osang kecha mali.

Iba lendong nung Phaimol tenla ki dak alaka yimtsüing nung tanüngba ki 15 ajunga mitsü küma rongdoktsü.

Iba tayangzük küpzükba ama nisung telok kati tanü 1:45 ako meta Indo-Myanmar Border Pillar No. 101 anasa aliba Shangkhalok Tangkhul village rongdoktsütsü merang.

Ajisüaka, security forces-i yimtsüing ajunga meraksatsüdaksü noktangteta liasü. Iba tatalokba nung Myanmar refugee tem indang ki kar den Tangkhul nunger ki kar mi agi rongdokogo.

Shangkhalok aser Phaikhoh tsüngda Tangkhul nunger alibdak Huimine Thana nunga ki tenet mitsü küma rongdoktsüogo ta ketdangsürtemi ashi.

Iba tatalokba anaprong atema ken o tem benokogo aser mapa inyaktertem putettsü atema bushisüngdang tenzükogo ta police-i ashi.

DCC-i "Chhatron Ki Goonj" (Students' Outcry) campaign agi



July 1, 2026 nü Congress Bhavan, Dimapur nung Dimapur District Congress Committee (DCC)-i osangbener senden ka ayonga amendang agiba noksa ka angur.

Dimapur, July 1, 2026 (TYO): Dimapur District Congress Committee (DCC)-i Congress Bhavan, Dimapur nung osangbener senden ka ayonga menogo.

Iba sentong ya Indian National Congress-i linük ajungalen "Chhatron Ki Goonj" (Students' Outcry) campaign agiba nung iba ya shilem ka lir aser DCC President Kutoho Chishi lenisüba kübok agi.

India education system nung tebilemsü tulu adokba aser linük nung kaketshirtem aser lanurtem den külemi noktakba sayua INC-i iba campaign agir.

"Linük nung aiben question paper leaks, examination nung tim masüba, recruitment processes mapang atsülangba aser administrative tamakoktem ajanga kaketshir aser mapa bushir million aika teimla aser taginübatem nung kongshiogo" ta Kutoho Chishi-i ashi.

"Ochimashi aser ketdangpuri tamakok anguba ajanga kaketshir tajungtemi takoksa ajurur. Linük tarutsü ya lanurtem dak keta lir aser kaketshir shiai fair examinations, affordable education, aser dignified employment temeten angutsüla" ta pai ashi.

Congress party-i linük ajungalen "Chhatron Ki Goonj"

campaign ya kaketshirtem ola tuluba kümdaktsütsü aser tematiba jenjang nung parnok t e b i l e m t s ü t e m angadangaktsütsü asoshi agir ta DCC President-isa ashi.

"Chhatron Ki Goonj ya Indian National Congress-i tenzükba national movement ka lir aser iba ya linük nung kaketshir aser lanur tarutsü kümzüka ayutsü atema lir, kechiyong parnok ya linük asoshi chichiba tongshitem lir" ta State Minority Chairman, Javed Sarwar-i ashi.

India ya alima nung linük tanubosang lir saka youth unemployment aser education crisis tulu ajurua lir. Kaketshirtemi küm aika meranga zünger competitive examinations agütsür saka paper leaks aser education system nung tashishitsü keta inyaksangshiba ajanga temeten mangur ta pai ashi.

Chhatron Ki Goonj tetezü ya "Students' Outcry" lir aser iba ajanga India lanur million aika indang tejashi aser mepelaba sayur ta NSUI Nagaland President X Chophika-i ashi.

Lanurtem ya linük tarutsü ta jembir saka tang aliba education system ajanga parnok nem teimla magütsür. Examination menuba, paper leaks manenba,

educational costs teimba akümba aser mapa manguba khuretttem ajanga lanuputu tarutsü raksatsür ta pai ashi.

Tawa tu Leader of the Opposition Rahul Gandhi-i Kota nung sentong ka nung kaketshirtem den sensaksema liasü aser idangji pai parnok khuretttem angaogo aser kaketshirtem ola sorkari angashitsüsa nationwide campaign tenzüksüogo ta Chophika-isa ashi.

Kümshia kaketshir million ana tema National Eligibility cum Entrance Test (NEET) agütsür, ajisüaka paper leaks aser examination nung tim masüba ajanga kaketshirtem aser parnok kibongtem timtemdaksür, ta paisa shisem.

Dimapur District Congress Committee-isa Union Education Minister Dharmendra Pradhan mapa nungi anentsü takhangba agütsüogo.

Linük nung education aser examination system dak tamang mekhatettsüsa akümba atema tenüng agia Dharmendra Pradhan-i mapa nungi anentsüla ta Dimapur DCC-i takhangba agütsür.

Iba osangbener senden amenba sülen Rahul Gandhi-i Kota nung kaketshirtem den jembiba video sayua liasü.

Northeast state tem nung tzünglu kanga aruba ajanga timtemteper

Guwahati, July 1, 2026 (Agencies): Northeast state tem nung tzünglu aruba ajanga tzümetsüng aser anentsüh lendong balala ajuruogo aser Arunachal Pradesh nung nisung asem asü aser Assam nung yimtsüing aika tzü agi metsüngbanga lir.

Arunachal Pradesh nung June 24 nü Keyi Panyor district nung tzünglu kanga aruba ajanga tzümetsüng lendong tulu ajurua liasü. Iba lendong nung Yazali anasa Panyor Hydel Project colony nung ki, lenmang aser aputem ponger ogo.

Arunachal Pradesh kübok district 28 nungi 12 nung nisung meyrjang aika tzümetsüng agi

kongshia lir ta media reports ajanga ashir.

Indian Air Force, National Disaster Response Force (NDRF), State Disaster Response Force (SDRF), police aser district ketdangsürtemi rescue operations inyaka arudar.

Union Home Minister Amit Shah-ia Chief Minister Pema Khandu den jembiogo aser central teyari agütsütsü nangzükogo.

Arunachal Pradesh nung tzünglu kanga aruba ajanga Assam nung tzümetsüng tulu ajurua lir. Dhemaaji, Lakhimpur aser Dibrugarh dena district 6 nung nisung 22,000 tema dak tzümetsüng agi kongshia lir.

Assam nung yimtsüing 100 aser alu 1,600 hectares tema tzü agi metsüngbanga lir. Dhemaaji nungbo ayongkümlen anenzüka aoba ajanga Simen River madak railway bridge chirepogo aser iba ajanga train services dak kongshiba den yimtsüing aika den tesentaktep mali lir.

Meghalaya nunga tzünglu kanga aruba ajanga anentsühitem aluogo aser transport tsütsü tetsükdaktsü ajurua lir. Sikkim nunga Phee Khola ajanga yangluba Bailey bridge ponger aoba ajanga road connectivity mali kümogo. Nagaland nunga ketdangsürtemi ajungben tzümetsüng aser anentsüh alutsü metetdaksüogo.



Census 2027 House Listing Operations (HLO) nung shilem ka ama July 1, 2026 nü Nagaland Governor alidak Lok Bhavan, Kohima house listing asüdang agiba noksa ka angur. Iba house listing mapang Nagaland Governor Nand Kishore Yadav, Deputy Commissioner & Principal Census Officer, Kohima B. Henok Buchem aser City Census Officer den tanga Census ketdangsürtem liasü. (Kohima, July 1, 2026)

Dept. of Industries & Commerce-i Entrepreneur Award 2025 ayongzük



Advisor Hekani Jakhalu den department ketdangsür aser sempet angurtem Entrepreneur Award 2025 sentong nung tangokba noksa nung angur.

Dimapur, Chiteni/July 01 (TYO): State nung entrepreneurs temi takok tajung anguba aser entrepreneurship development nung shilem agiba tushitsü atema Department of Industries & Commerce, Nagaland ajanga July 1, 2026 nü Kohima nunger par Conference Hall nung Entrepreneur Award 2025 ayongzüka liasü.

Iba sentong nung department-i entrepreneurs ti nem tetushi agütsü, shirnok state tesem ajungalen nungi applications agütsüba State Selection Committee ajanga asadanger shima liasü.

Director, Industries & Commerce, P. Tokugha Sema-iba sentong nung jembidang, Advisor, Industries & Commerce, Hekani Jakhalu-i item sentong takok anguba nung shilem tajung agiba aser department inyakyim nung len aniba asoshi pelaba lemsatapa liasü.

Sempet angur nem tenüngsang agütsüba mapang pai parnok ya entrepreneurs tejangja lir aser parnoki meranga inyakba, bendanga agütsüba aser temulungtetba tajung nung inyakba temaitsü item takok ya lir ta ashi.

Entrepreneurship nung timtem balala ajurua mapang agir, aser yangji tejangraba, bendanga agütsüba nungdaker, aser itemji melira takok mangutsü, ta pai ashi.

Enterprise yangertsü atema

küm aika agir aser bendanga agütsütsü nungdaker, aser pei nükjidong nung rangloker temulung agüja inyaker temi takok angutsü, ta Tokugha-i ashi.

Advisor Hekani Jakhalu-i sempet angur nem tenüngsang agütsü aser Nagaland rongsenketzüng nung mapa agütsüba aser enterprise terenlok ajanga shilem agiba asoshi tetushi agüja liasü. Parnoki takok anguba asoshi tetushi agütsüba kisüng masü saka state, national aser global level nung parnok indang business ulushia aotsü ajungmesotsü atema lir, ta lai ashi.

RAMP (Raising and Accelerating MSME Performance) programme kübok department-i inyakba indang lemsatapedang, state nung entrepreneurship ajungkettsü asoshi village-level workshops densema sentong balala ayongzüka agia arur, ta Jakhalu-i ashi.

Ita trok mentoring programme ka atema MSMEs 750 jangjatetogo aser parnokji entrepreneurial sector nung Nagaland indang representatives kumdaktsütsü, ta lai metetdaksü. Itemji timba Naturally Nagaland inyakyim kübok lir, koba Made-in-Nagaland products nung tali rangloker.

Jakhalu-i entrepreneurs tem dang "founder's trap" nungi jenbua alitsü ayongzük, kong business kiburtemi inyakyim ketdangsüba nung pei sasa pei

dak metaloka akumer aser ibaji ajanga training agütsü mesüra angazüktsü maongka agütsü tasak akumer. Aintsü asoshi tanen makai angazüktsüji tongtipang lir, ta Jakhalu-i ashi aser business ecosystem tashi itdaktsütsü asoshi networking nung temulung agütsütsü ajungmesoa liasü.

Laisa MSMEs aser local businesses tashi itshitsü nükjidong nung inyakba nung Chief Minister Neiphiu Rio-i yariba atema pelaba lemsatapa aser entrepreneurs yagi state tarutsü rongsenketzüng terenlok nung tongti shilem agütsü ta ashi.

Sector balala nung alakteta inyaktetba atema sempet agütsürtem ya Pisala Sangtam (founder, Forever Handmade 21, Kiphire); S. Khumo (proprietor, Art & Craft Unit, Noklak); Liyingbeni Odyuo (founder, Liying Clothing, Dimapur); Vitoli Achumi (proprietor, Aasuto Enterprise, Dimapur); Imtisunup Longchar (founder, Ilandlo Services, Dimapur); Ajung Yaden aser Atem Longkumer (founders, TRIBOLT, Dimapur); Supongtola Aier (proprietor, Zonee Food Products, Dimapur) aser Alem Konyak (founder, Beads Jewellery, Mon Town) alitsü.

Sentong nung Additional Director, Er. Y. Lipongse Thongstar menden liasü aser Joint Director K. Francis Hekavi-i melepzüng o jembia sentong tembang.

NPWD-i Engineer-in-Chief aser Chief Engineer den tepila sentong agi

Dimapur, Chiteni/July 01 (TYO): Nagaland Public Works Department (NPWD)-i Er. K. Imnajungba, Engineer-in-Chief aser Er. T. Sao Sangtam, Chief Engineer (NH) na nem tetushi agüja tepila sentong ka June 30, 2026 nü NPWD Conference Hall, Kohima nung ayongzüka liasü.

Iba sentong nung senior officers, NPWD indang kongsang balala nungi HoDs den department staff tem dena liasü.

Er. K. Imnajungba aser Er. T. Sao Sangtam nati iba sentong nung tepila o jembidang külem tenzüker dang pelaba lemsatapa aser tajungshi o kar jembia lanur

ketdangsürtem dang nüburtem ajungtsü atema maneni bendanga agütsür inyaksü ajungshia liasü.

Tenati tesüiba mapang ajangshibatam lemsatapa aser sentong nung dena alirtem dang service tajung agütsütsü aasoshi maneni bendanga agütsütsü ajungmesoa liasü.

Tenati lanur engineer tem dang Tsüngrem dang sarasademba ajanga takok angutsü ta ashi.

Iba sentong nung department ketdangsür temia o tatsütsü jembidang tena dak sempet tajung aliba asoshi tenüngsang agüja liasü.

Iba sentong nung EE, PWD (H), Er. Akule Pusa

menden liasü aser EE, PWD (NH), Er. Imsanenla Imchen-i sentong tenzüka sarasadem.

NPWD staff aser EE, Lisela Sangtam nungeri telok ken ka aten aser iba sülen Chief Engineer, PWD (PEP), Er. H. Vihokhe Sema; Chief Engineer, PWD (Mechanical), Er. Vitsozol Chaya; Chief Architect, PWD (P&D), Ar. Lhouville Yhor; Addl. Chief Engineer, PWD (R&B), Er. Neilabeizo Angami aser SE, PWD (NH), Er. C. Hendo Sumao nungeri o jembia liasü.

Sentong tembanga Addl. Chief Engineer, PWD (H), Er. Fineson Pojar-i melepzüng o jembia.

NDMA-i MyGov den lungjemer Poster Making Competition ayongzük

Dimapur, Chiteni/July 01 (TYO): National Disaster Management Authority (NDMA)-i MyGov den lungjemer linük tesem ajunga nung school azünger asoshi Heatwave Safety dak sendakba nung Poster Making Competition ayongzüker, ta Department of School Education sangdong ka nung metetdaksü.

Iba tetoktepba ya July 15, 2026 tashi alitsü.

Poster Making Competition ya "Stay Cool, Stay Safe" omen kübok ayongzüktsü aser senpet sen ya mezüng jenjang asoshi 50,000, tanabuba jenjang asoshi 30,000 aser tasembuba jenjang asoshi 20,000 agütsütsü.

Iba tetoktepba dak sendakba nung osang tejangja ya NDMA indang website <https://www.ndma.gov.in> aser MyGov <https://www.innovateindia.mygov.in/stay-cool-stay-safe-poster-competition/> nung angutsü.

DEOs/ Sr. SDEOs & SDEOs ajungai pei jurisdiction kübok CBSE, Kendriya Vidyalayas, Eklavya Model Residential Schools, Kasturba Gandhi Balika Vidyalayas aser Navodaya Vidyalayas densema school (Govt. & Private) ajunga nem nungdakba totuyuba tem agütsütsü metetdaksür, ta Department sangdong ajanga ashi.

ATI Kohima nung KKK training tenzüko



ATI Nagaland nung Karmayogi Kartavya Karyashala (KKK) training agidang tangokba noksa nung angur.

Dimapur, Chiteni/July 01 (TYO): Karmayogi Kartavya Karyashala (KKK) indang anogo ana training sentong July 1, 2026 nü Administrative Training Institute, Nagaland, Kohima nung tenzüko. Iba training ya Personnel & Administrative Reforms (P&AR) Department, Government of Nagaland ajanga Capacity Building Commission, Government of India aser ATI, Nagaland den lungjemer ayongzük.

Iba training nung Nagaland Police, Municipal Affairs, SCERT, Social Welfare, Health & Family Welfare, aser State Institute of Rural Development, Nagaland department tem nungi nisung 40 shilem agitar.

Iba training tenzüka sentong nung Additional Chief Secretary and Director General, ATI, V. Shashank Shekhar, IAS ajanga jembidang, sorkar tenzüker atema tongtipangtiba teinyaktsüji tajemzüka jenjang nung alirtem bendanga agütsür aria bilema tenzüksüba ya lir ta ashi.

Pai training nung shilem agirtem dang pei mapa inyakba aser aliba tesemtem nung

temelenshi bener arutsür aser tangar nükrangdong ka ama agizüktsü ajungshia liasü.

Iba senden nung Under Secretary, P&AR, Limakumla menden liasü aser Additional Director, ATI, Bendanglila den institute nungi ketdangsür aser staff tem dena liasü.

Iba training nung shisalen sayur ya RIMS, Imphal nungi Dr. Rajkumari Surbala Devi, Dr. Tanya Nandkeoliar aser Capacity Building Commission nungi Maibam Warish nungertem alitsü.

Karmayogi Kartavya Karyakram ya alima nung training inyakyim tulutiba ka ama linük tesem ajunga nung tenzüker. Ibai frontline government ketdangsür mulungjang nung pei agütsü meblemi nübur tenzüka tanüla adokdaksütsü nükjidong nung lir.

Iba model ajanga National Lead Trainers (NLTs) temi State Master Trainers (SMTs) nem training agütsütsü aser nungdakba training renema State Lead Trainers (SLTs) ama kulizüng agütsüba sülen parnoki department balala nung frontline ketdangsür nem training agütsütsü.



Mon district kübok Tizit Sub-Division nung July 1, 2026 nü Census 2027 indang phase mezüngbuba House Listing operation tenzüka agidang tangokba noksa nung angur.

Gujarat CM Patel-i 'Viksit Gujarat 2047' sayaogo



Ahmedabad, July 01 (Agencies): Bodhbarnü Gujarat Chief Minister, Bhupendra Patel-i state nung terenlok mapa inyaksü atema asalentong 'Viksit Gujarat 2047 Implementation Roadmap' sayaogo.

Iba asalentong ya Gujarat State Institute of Transformation (GRIT) aser Planning Division, General Administration Department nati senteper renem aser Bodhbarnü Gandhinagar nung saya. Iba sentong nung cabinet minister tem, Chief Secretary MK Das, CM atema Chief Adviser Hasmukh Adhia aser

tongti ketdangsertem aika liasü.

Iba sentong nung jembidang Patel-i, iba asalentong ya Ato kilonser Narendra Modi mangdang "2047 küm tashi nungbo Terenlok India" den sendaktepa lir, ta ashi.

"Iba asalentong nung kechisa inyaksü nüngdaker, shibai inyaksüla aser koba mapang tashi nungbosa renema inyaksüla, item ajak tejangja metetdakja lir," ta pai ashi.

Item asalentong benoka inyakba ajanga sensotem taküm jenjang ajungkettsü aser infrastructure terenlok tajungba akümtsü, ta pai metetdaksü.

Patel-isa, iba asalentong ajanga state mangdang "Junga aazükba, Junga aliba" ataloktsü, ta ashi.

Amalitepa inyakba ajanga Gujarat-i terenlok tsütsü alizüngtem tongtettsü, ta shia chief minister-i ketdangsertem dang tajungtiba nung inyaksü ayongzük.

Kasa sentong nung jembidang Chief Secretary MK Das-ia, item asalentong inyaksü atema state nung senotsü peria lir, anungji atangji mapa küma inyaksü atema kanga nendaka inyaksüla aser mapang shia itemji asadangtsüla, ta ashi.

Sena (UBT) lenir Sachin Ahir Shiv Sena nung denogo

New Delhi, Chiteni/July 01 (Agencies): Shiv Sena (UBT) atema tetsükdaksü adoka taoba MLA Sachin Ahir Mongolbarnü Maharashtra deputy chief minister Eknath Shinde-i aniba telok nung denogo.

Ahir ya taoba mapang Worli nungi MLA lir aser pa Aaditya Thackeray den kanga junga sendaktepa liasü. Pa Maharashtra Legislative Council nung deputy chairman mapa atema nomination file süogo.

Iba tatalokba indang jembiba mapang Shrikant Shinde-i, Ahir Shiv Sena nung denogo aser deputy chairman election atema pa nem nomination form agütsüogo, ta ashi.

Kasa mapang nung Sena (UBT) lenir Ambadas Danve-i, MLC Jagannath Abhyankar ya Maha Vikas Aghadi nominee

asütsü shimogo, ta ashi.

Vidhan Bhavan nung osangbenertem den sensaksemba mapang state Minister aser Shiv Sena leader Uday Samant-i, "Sachin Ahir ya MLC züngsem tejen ka lir aser pai Mumbai nung aliba nübурtem atema ola adoka aruogo. Iba amala tajangshiba aika bener aliba lenir ka Shiv Sena-i aruba atema pelar. Onoki temzüng ozüng dak sendakba nung tinyaksü ajak inyakba sülen iba telemtetba agiogo," ta ashi.

Maneni Shiv Sena (UBT) MLA Sunil Raut-i ashiba agi, Uddhav Thackeray-i aniba party masetshi-i lir.

"Onoki taoksatsü osang aika angashiogo, saka party tatembang ka dangi maru. Iba ya Shiv Sena (UBT) asoshi taoksatsü tulu ka masü," ta pai

Vidhan Bhavan nung osangbenertem dang ashi.

Ahir indang political career ya Indian National Congress nungi tenzük aser iba sülen Nationalist Congress Party nung aden. Maneni pa Aaditya Thackeray lenisüba nung Shiv Sena nung dena liasü.

Küm pezü tejakdang Shiv Sena lemdangba sülen Uddhav Thackeray-i aniba telok mepetmesü nung aliba mapang tang Ahir-i party melenogo. 2022 küm Shinde-i anir party MLA timba kati Shiv Sena toktsü aser iba sülen parnoki party tenüng aser temaitsü dena agia liasü.

Taoba hopta Lok Sabha MPs trok Sena (UBT) nungi Shinde-i aniba Shiv Sena nung dena liasü. Iba ajanga Mahayuti alliance nung Shinde jenjang tajungba kümdaksüogo.

Bupivacaine anaesthesia mozü amshiba tangsa anentsüla: ISA

New Delhi, Chiteni/July 01 (Agencies): Surgery/operation agiba mapang shi asütsü atema tongtired nung tutsüba Themis-i yangluba bupivacaine anaesthesia mozü amshiba ya tangsa anenang, ta Indian Society of Anaesthesiologists (ISA) doctor tem dang metetdaksüogo.

Themis-i yangluba bupivacaine mozü tutsüba ajanga temang nung timtem tulu adokdaksür, ta ISA-i bushitetba sülen iba tetuyuba ya agütsür.

ISA-i linük tesem ajaklen anaesthetic doctor tem dang shi asütsü atema tongtired nung tutsüba bupivacaine ya mamshii atatsüla, ta ashi.

Surgery agiba mapang nung shimang süadoktsü atema Bupivacaine mozü ya tongtired mesüra tongtired anasa aliba 'epidural' nung tutsür.

ISA-i, Themis-i yangluba mozü ya tutsüba ajanga temang nung timtem tulu agütsüba bushitetogo, ta metetdaksü.

Ajisüaka ISA-i temang nung timtemji koma adokdaksüar ibajibo memetetdaksü. ISA-i maneni iba mozü ya bushisüngdangdar.

ISA-isa hospital tem danga hospital nung riziunga aliba iba mozü ya bushia tanga mozütem den bendanga balaka ayutsü, iba mozü mamshitsü aser shi asütsü atema tongtired nung atuba tanga mozü dang amshitsü metetdaksü.

Ano külen ISA indang Hyderabad Metro City Branch-ia temeja sangdong ka ajanga consultants, resident doctor tem, anaesthesia technician tem aser operation theatre nung inyakertem dang Themis Bupivacaine mozü amshiba ya tangsa anenadoktsüla, ta metetdaksü.

Indian Society of Anaesthesiologists indang Hyderabad Metro City Branch Tir, Dr Sherry Mathews-i, "Iba tetuyuba ya shirangertem kümzüksü atema tekümdangtsü metetdaksüba tetuyuba ka lir. Iba mozü ajanga timtem adokba osang Hospital aika nungi nguogo, aser bushisüngdangba maparen metembang tashi iba mozü amshiba anena atatsü onoki doctor tem nem metetdaksüogo," ta metetdaksü.

Agra nung TET papers menüngba Education Minister-i memeteti liasü

New Delhi, July 01 (Agencies): Bodhbarnü Maharashtra nung BJP lenir, Sudhir Mungantiwar-i, state school education minister Dada Bhuse-i Teacher Eligibility Test (TET) question paper Agra yimti nung menügbaji memeteti liasü, ta metetdaksü.

TET paper leak asüba sülen iba tatidang ya thinenogo.

Mungantiwar-i, education minister Bhuse ya Maharashtra deputy chief minister Eknath Shinde-i aniba Shiv Sena nungi lir, ta metetdaksü.

Bodhbarnü Vidhan Bhavan nung osangbenertem den jembidang Mungantiwar-i, "TET question paper Agra nung menüngba osangji education department-i pa nem memetetdaksü, ta school education minister-i shiogo. Agra ya akhidang nungi Maharashtra den tesendaktep junga lir, kechiyong Chhatrapati Shivaji Maharaj yang nungjagi ajen, ajisüaka tanübo examination paper leak asüba temenen-a yangji menaogo," ta ashi.

Paisa, "Tangbo examinations ji online ajanga dang agitsü aser question papers ji yangi renemtsü

ta pai shiogo. Ajisüaka iba ya ajanga school education department nung tashimait tulu aliba kuli sayur," ta metetdaksü.

Mungantiwar-isa, "Ni Bhuse dang exam junga ketdangsüa agitsü aser tarutsü nungbo item ama mataloktsü atema state sorkari ayongzüka exam agiba shia audit jungjunga agitsüla ta shiogo," ta metetdaksü.

TET paper leak asüba bushisüngdangertemi ashiba agi, Maharashtra State Council of Examination-i TET papers menüngtsü atema Agra nung aliba Mahim Patran Pvt Ltd nem agütsü. Ajioda paper menüngba sülen paper ji Maharashtra tesem ajaklen exam centres-i belenshia liasü. Maharashtra TET 2026 exam agitsü anogo ka dang lia iba paper leak asüba jangjaba sülen June 27 nü iba tatidang thinenogo. Iba exam thinenba ajanga candidate lakh 6 kongshi aser opposition lenirtemi BJP-i aniba sorkar aitsü tenzüka liasü.

Paper leak asüba ken o dak sendakba nung Thane district nung aliba Bhiwandi Police-i tang tashi nung Bihar aser Haryana na nungi nisung pezü puogo.

India aser Pakistan nati tepuokdak alirtem 'list' agütsütep

New Delhi, Chiteni/July 01 (Agencies): Bodhbarnü India aser Pakistan nati peipei linük nung tepuokdak alirtem list lemsatepogo; 2008 küm nungi küm shia linük anati 'Agreement on Consular Access' kübok tepuokdak alirtem list lemsateper.

2008 küm May 21 nü linük anati tezüngzüktep agia aliba kübok India aser Pakistan napronglai peipei linük nung tepuokdak balala nung aliba tenüngtem metetdaksür. Iba tezüngzüktep kübok linük anati küm shia January 1 aser July 1 anogotem

nung iba list ya lemsateper. Iba tezüngzüktep kubok linük ana nung apuba tenüngtemji High Commission den lemsateper.

Ajioda July 01, 2026 nü India-i linük nung pua aliba Pakistan nunger 386 aser Pakistan nunger angopur 53 pua aliba metetdaksü. Pakistan-ia par linük nung tepuokdak aliba India nunger 52 aser India nunger angopur 198 metetdaksü.

India sorkari India nungertem aser angopurtemji tekaraba nung chiokang ta ajungshia arur aser tanga kasa temepishiba agütsüogo.

Yamaji Pakistan-ia India sorkar dang Pakistan nunger 97, tepuokdak aliba civilian 64 aser angopur 33 nungjagi tepuokdak ayuba kümsük abensar alirtem tekeraba nung chiokang, ta mepishiogo.

India aser Pakistan tsüngda tezüngzüktep kübok iba list lemsatepba sülen sensotem maitsüji jangjar aser jail kümsük abensartem iba ka tsüngda chioker.

2014 küm nungi tenzüka tang tashi nung Pakistan-i India nunger angopurtem 2,661 aser India nunger civilian 78 chiokogo.



बैंक ऑफ बड़ोदा

Bank of Baroda

Regional Office, Jorhat, Crystal Enclave, Seuni Ali, Borpool, A T Road, Jorhat-785001 (Assam)

ADVERTISEMENT

Bank of Baroda-i Kiphire, Dist: Kiphire, Nagaland nung ATM Premise den Solar Panel install asütsü atema aser power peria lia Branch tasen lapoktsü atema Ground floor nung tesem tasazük 1200 - 1500 sq. ft aginüa kiburtem/kibur atema inyaksür dang nungi offers meshir. Iba ama tesemji ita ana tsüngda atsüngtsü mesüra atsüngtsü atema renema alitsü. Offers agütsütsü tebilemba alirtemi offers ji sealed cover temeja ana nung superscribed Technical bid aser Price bid ji Assistant General Manager, Bank of Baroda, Jorhat Region, Crystal Enclave, Seuni Ali, Barpool, Jorhat - 785001 nem 15.07.2026 anogo tashi nung mesüra iba anogoji matongdang agütsütsüla. Public Sector Units / Govt. Departments nem tama yimli agütsütsü. (Osang tejangja atema onok indang web site www.bankofbaroda.bank.in nung aliba tender section nung reprangang) Kuli kecha magütsüi offer agizüksü mesüra magizüksüji bank dak temeden lir.

Date: 02.07.2026

Place: Jorhat

Sd/- Assistant General Manager

Jorhat Region



TIR YIMYIM YIMOBILEM (EDITORIAL)

DIMAPUR THURSDAY, JULY (CHITENI) 02, 2026

Na kong alitsü ?

Tang ya linük ajaklen nütsüng yongsük sükdangba mapang lir, anungji iba sentongji tenzüka joko kilen sükdangba mapabo tenzüko. Aji oda, iba nütsüng yongsük sükdangba inyakyim nung tamasa nisungtem aliba ki azüngtsü aser iba sülenji dang nütsüng azüngtsü. Ibaji angshia tesem kar nungbo nisung malitsü asüyonga kilen aika sayutsü atema mashimashi asüyonga süngküma-süra amshia ki asüba osanga angashiogo, kechiyong ki aika sayu nung dang nütsüng aika sayutetsü ta asenok kolok techira agi melamelaa angateter. Ibaji nisunger yimya dang kechiyong nisung ajaki tuluba aser teimba aginer. Ano, talisa, tang ama nütsüng sükdangba sentong indang jembidang jet ta asen mulungjangi election dang arur aser asenok asoshibo election ya Lasihiba danga taoba, kechiyong election mapangbo asenoki Laishiba dak masü saka 'electoral politics' dak dang amanger. Ajisüaka, asenoki metettsüba kaji linük nung nütsüng yongsük sükdangba mapa ya electoral roll nung tenüng zülüoktsü asoshi dang masü saka yimtak yimtsüng aser town shia nung terenlok mapatem inyaksü asoshi nütsüng nübo züngdangba sentong ka lir. Aji oda, yimtaka sang, town nunga sang, nütsüng nübo apir dang government-i nübortem nüngdak agütsü, anungji asenbo tesem ka nung alir aser tenüngbo tanga tesem ka nung zülüok ta asüba jagi asenoksasa asenok ashioksü asütsü. Talisa town-tem nunga nütsüng yongsük apir dang Town Council aser Municipal council jenjang agütsütsü, anungji asenok Municipal aser town council aliba tesem nung alirtemi pei alidak masü tanga nung asen tenüng zülüokra, iba jagi Municipal aser town council asütsüsa nütsüng agi madoksa akümtsüa akok. Iba kasaji, Rural nung süli, Urban nung süli nütsüng yongsük apir dang nübortem asoshi nüngdakbatem inyaksü atema senotsü lemzüksütsü, anungji asenok kar talibo town nung alir saka tenüngbo yimtak zülüok ta süra tangar tenüng nung aruba aser agütsüba tajangzük agi asen alir ta bilemdi. Aji oda, talisa, asenok aika Tsüngremi moaja Dimapur aser Chümoukedima nung ali kimong kibur küma sensosa alir ser nung, asenoki asen teti alitsüba tesem toktsü asenoki tanga nungang asen tenüng zülura, iba jagi asenokang timatemtsü, kechiyong asenoki asen alidak nütsüng ajemtsüba jagi terenlok mapatem inyaksüba jenjang ajemtsü. Aji oda, government-ibo asen alidak town nung mozü ki tuluka yanglutsüner saka census nung nütsüng ajemra sayur, anungji mozü ki tuluka yanglu malang akümer. Kasaji, terenlok mapa ka inyaksü atema sentong, project, yangludang tamasa nütsüng kwi ta asüba jagi kanga tongtibangsa süksü. Anungji, asen shitakba alidakbo nütsüng mali saka asenok malidakang nütsüng aika ali amai sayur ta süra terenlok mapatemji nütsüng alidak masü nütsüng malidak küma adoktsü. Joko, asenoka ongo ozüi longtrok mama ama mesüi, longtrok nungi koridang aser soyim lima ajanga Dimapur, Chümoukedima aser Niuland tongtetkaji, itemji asen lima kümer asen nüboa, shisatsü aser rongsenang yangji agüja asen lima tuluba küma yanglutsü bilema inyaksüba jagi asenok ajak atema temoatsü asütsü. Joko, asenok Dimapur, Chümoukedima aser Niuland nung alirtem asoshibo oagi Mokoching district nung pei tsürabur yimtak pei tenüng zülüoka yur, yangji yimtak alirtem den raktepa election mapang asen vote ayoktsü aser yimtaklirtem tai menadaksütsü bilema malitsüla. Ashiko, Dimapur, Chümoukedima aser Niuland nung alir asen nisungtemi pei pei tsürabur yimtak election mapang shilem magi nungbo, candidate-tema sen ishika dang endoktsü aser yimtsüngtem nung meraratepi sarasadema ken tena election agi shitakba benjong küma pelatepa pei vote peisasa agüja election agitsü. Ibaji yimdangi arua bilemdi aser asenok kong nungi aru ta asüba jagi tongtibangba masü saka asenok tang ya kong alir aser senso küma teti kong alitsü aser kong aremtsü (?) ta asüba tsütsüang tongtibang küma bilema, tang ama kilen azüngdang aser nütsüng yongsük sükdangba mapang shilem agitsüla.

OLEMSABANG

Ao agi "Tir" ya shir dang ajatsüla?

~ T. Meren Paul, Lower PR Hill, Kohima

(Yashi adok nungi...)

Saka Watsü demi Tir ta amshiba nung parnok tai kecha mali ta ajeteter kechiaser asen Ao Senden Literature Board-i adokba dictionary Arok Osep 2019, tapak 266 mezüng ojang ratet nung -tir² /tir/ n. mendenbuba, lenisang, tokolakba, president ta jangja jangja-a ajenloka lir. Ao Naga Dictionary Dr. Clark-i 1911 küm adokba page 885 ojang ratet tarensen 5 puba nung Tir, a chief, a captain, a commander; im tir the chief or head man of a village; terer tir the captain of a war company. Arizu tir the commander of the arizu, commander of the military department who may be called simply tir; in former times worship was sometimes paid to a living or dead tir. Ano ABAM-i Revised Edition 2013 nung adokba Ao Naga Dictionary by Dr. E.W. Clark page 850 nungjia kasa jidang adoka lir saka Arok Osep 2019 nung asensa-a tir tetezü mendenbuba, president ta mapa aser yimya dak mapet ratettsüba jagi Watsü dem-a Tir ta amshitsüji temeden agütsüba angur. Liashiba nungo Isarel tsür Deborah rarai aoba angur; Indian history nung ah Rani of Jhansi kor rongdong nung mener Birtish nunger den Sepoy Mutiny mapang rarai aoba angur, saka asen sobaliba nung tetsür raraia/arrishi maor aser mitkar a masür. Tanüasüngbo tetsür-a police aser army nung Commander akumer saka asen sobaliba nung tetsür arrishi-i maor, Arju nung mayiper, nok, nü, jong amer yimmaker arudang tongpang nung menokdaker, ajioda Tir ta amshibaji tetsür tenüngtet masü anungji tang tasen adoktsüba aliba dictionary nung shisa akiteper tapensaba nung adoka shidak angazükdaktsü nung ajungtsü. Longkhum yimtisanger tebur tain ajak yim ajak temshia Nokrang yim amaktsü arrishi-i aor ajak agi 823 liasü. Otsü agi ashiba agi parnok 823 washia molushishia ok atena ali nung ajemdang ali anokshia tsüngken tulu adok agi oda iba anogo nungji tetsüria arishi jagi onüa asü ta ashi saka tetsür arrishi-i maor asüba agi tetsürbo shinga mao. Dictionary nung tai adoka aliba metongshitsü atema ano tanga kaket ka adoktsü masüji anogo mapang aika agiakah shidak adoktsü merangtsüla ta ajungshir.

Ano, tenüng walok ta asüba indang ah ni tera angazükba otsü lemsatepner. Aori Walok ta jembiba ya tsüngrem dang aren temoatsü tali meshia kulemba dang ajar. Walok ta asüba jagi kaaeta aliba nung ano tali renloka bendenloka akatsü bushiba saka makaba nungbo mewaloker. Süchiri ano tanaben tasemben sü achitsü aser sükolak renloktsü (increase) temoatsü aren arutsü asoshi takum ka, an mesüra ak ka agi kulemer. Sü kolak nungji shiruru züji raklokja putiri tsüngremdang aren jazüka kulemer, koba dang sükolak walok ta ajar. Takari alu nung tsük aika ruha tsük chen renloktsü atema tsük chen kidang waloker. Tsük Chen walokdang takum shiruru ka, an mesüra ak ka agi waloker. Putiri shiruru tepseta iba azü ji akizüka chen kikumdong anatsülen aser azüklen kikumbang tekalen aser aser tetsünglen ajak nungji azüji mezüloktsütsü. Ano tsük chen kidang aliba Anong aser Mosem nungji shiruru azüji mezülokja putiri kulemer. Kaaeta aliba dang nungi tali renloktsü temoatsü meshia kulemba asünung aren meshia walokba ta ajar. Arrleperi ano mangko tali lepdakjang ta mangko waloker saka arrlepsang dakji waloker masü. Aji oda nisung tenüng nung walokba indangbo jembia mangazük. Walokba ta kodang südir idakji takum ka tepseta akih tzürapur yimya nung iba züji raklokja kulemküja züngyazüngko inyaka mapa asünung tanü aseni amangba Kristan yimsü den kenyonji mapet anungji walokbaji asenok Kristan mapa masü ta rajemdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

EFI-i Rev. Dr. Aowabang Ozüküm NE India nung Asso. Secretary shim



Guwahati, June 30, 2026: Mongolbarnü Evangelical Fellowship of India (EFI) Northeast Centre nung Rev. T. P. Mordecai den tepila sentong aser Rev. Dr. Aowabang Ozüküm Northeast India Associate Secretary mapa nung aniokba sentong agiba sülen tangokba noksa nung angur.

Guwahati, July 01 (Agencies): June 30, 2026 nü Guwahati nung aliba EFI Northeast Centre nung Evangelical Fellowship of India (EFI)-i Rev. T. P. Mordecai nem tetushi agüja tepila sentong agiba den külemi Rev. Dr. Aowabang Ozüküm Northeast India EFI Associate Secretary mapa nung shimokba sentong repsema agiogo.

Iba sentong nung Northeast region nung aliba Arogotem nungi lenirtem aika aden.

Iba sentong ya Rev. Surjeet R. Marak leniba nung agi. EFI General Secretary, Rev. Vijayesh Lal-i lokti pelaa agizük aser tesüba küm aika Tsüngremi EFI leniba indang metetdaksüba den külemi EFI-i Northeast India nung tenzükba wadang inyakba indang metetdaksü.

Council of Baptist Churches in Northeast India (CBCNEI) General Secretary, Rev. Dr. Namseng R. Mark-i Tsüngrem O jembia liasü.

Rev. Namseng-i Tenünsang Ken 92:12-15 nung ajemdaker tindang nisungtem süradong ama azükarutsü aser tantsür-tambur mapang nunga süngjang tangtsüba indang lemsatep.

Paisa Rev. Mordecai aser Rev. Dr. Aowabang Ozüküm nati Tsüngrem tenzüka aruba indang metetdaksü; lenir kati küm aika tenzüka aruba agi masadanger, ajisüaka süngjang maneni tangtsüba agi asadanger, ta ashi.

Iba sentong nung Guwahati nung Archbishop, Rev. John Moolachira-ia Arogo tenüng nung salem osang lemsatepba den külemi tenzükba tasen atema temoatsü meshija sarasademtsü.

Rev. Mordecai-i Northeast region nung EFI aser Arogo küm aika tenzüka aruogo. Yamaji

Rev. Vijayesh Lal, Allen Brooks aser Northeast India Regional Bishops' Council (NEIRBC) nung Deputy Secretary General, G. P. Amalraj nungeri pa nem tenünsang agütsü.

Kasa sentong nung Indian Evangelical Mission, Rongmei Fellowship, Manipur Baptist Convention aser Christian Literature Service, CBCNEI-ia Rev. Mordecai nem tenünsang agütsü.

O jembirtemi, Rev. Mordecai ya ajemalu tenzüka ka lir aser Northeast region nung Khristantem telongjem atema pai shilem tulu agiogo, ta ashi.

Parnokisa pai Assam Christian Forum nung shilem agiba aser 2023 küm Manipur

nung rara adokba sülen pai shilem tulu agiba metetdaksü.

2023 küm Manipur nung rara tenzükba sülen May 6 nungi EFI-i rara ajanga jenshirtem atema Northeast Centre lapokja liasü. Iba Centre nung ita aika Kuki aser Meitei nunger kibong aika Centre nung jenokdakja yaria aruogo.

Iba sentong nung o jembirtemisa, iba mapang nungji Rev. Mordecai-i ola madoki mapa tulu inyaka liasü, aser ibaji ajanga Khristan temeim kuli asü, ta metetdaksü.

Mizoram Presbyterian Synod Regional Secretary, Rev. Jerome Vanlalchhuanga leniba nung loktii Rev. Mordecai aser par kibong atema sarasademja liasü.

Iba sülen Rev. Dr. Aowabang Ozüküm mapa nung aniokba sentong agi.

Archbishop John Moolachira-i Rev. Dr. Ozüküm aser par kibong atema temoatsü meshija sarasadem.

Rev. Dr. Aowabang Ozüküm-i Tsüngrem nem tenünsang agütsüba den külemi pa ajungmesoa pa atema sarasademtsür Arogo nung lenirtem dang pelaba lemsatep.

Paisa, pai ajemalu aser amalitep tanela nung Northeast India nung aliba Arogotem tenzüksü, ta metetdaksü.

Sentong tembanga loktii "Tsüngrem dang sentsüwangshi süang" ken aten, iba sülen Mizoram Presbyterian Synod nung Executive Secretary, Rev. Dr. Rosiamliana Tochwawng leniba nung Northeast India nung EFI ministry atema sarasadema sentong tembang.

Iba sentong nung Baptist, Presbyterian, Catholic, evangelical mission aser independent Arogotem nungi lenirtem aika aden.

külemi democratic temeden alitsü aser iba Bill agentsü atema sarasademogo.

CBCI Tir, Anthony Poola-i, iba Bill ajanga Arogotemi mission mapa inyakba, temeim mapa inyakba, shisaliok, healthcare aser lokti tenzükba mapa balala inyakba nung timtem ajangshitsü, anungji iba Bill anema sarasademtsüla, ta metetdakja liasü.

CBCI-isa sangdong ka ajanga Arogotem aser Khristan rejutem dang iba Bill anema temepishiba shidi ka zülua local MP tem aser MLA tem ajanga sorkar nem agüjang, ta metetdaksü.

June 28 nü New Delhi nung aliba CBCI Centre nunga ghonda 9 maneni tekülem aser sarasadem agia liasü.

National Council of Churches in India (NCCI)-ia "We Oppose FCRA Amendment Bill 2026" omen

ANOGO ABEN TSÜNGREM DEN

Dawid Asoshi Ki Ka

T. Ken 132:11-18.

Tsüngremi chuba Dawid dang pa ki ka asütsü memela. Iba melen Tsüngremi Dawid asoshi ki ka sütsü. Tsüngremi ashi, "Dawid, ni ne temang asoshi ki ka mesütsütsü saka nübur asoshi ki ka sütsütsü. Idakji na nungi jakzükba ka teti Israel chuba menden nung alitsü".

Pai ano Dawid chirtem asoshi langka ashi, "Ne jabasotemi kü tezüngzüktepba aser kü kulitem koba Ni parnok dang sayutsü aji beshidi süra parnok jabasotem ne chuba menden nung teti mendaktsütsü. Kechiyong Kibubai Zion Pa talidak asütsü Pai aji aginü". (t.12,13). Idagi Tsüngrem chirtem asoshi teinyaktsü ka lir. Pai alima meyangludang Khrista nung asenok shimtet (Ef1:4) Yisui ashi, "Nenoki ni shim masü saka ni nenok shim" (Yn15:16). Koda Temeshi maongka tulu !

Asenok Tsüngrem chirtem asütsü shimtetta liasü. "Temeimbatem, dang asenok Tsüngrem chirtem lir, aser tesü asenok kechi asütsü ano jungkai madok. Pa jungkai adokdang asenok pa ama asütsü, kechiaser Pa komama lir aji oda asenoki pa angutsü, aji asenoki metet". (1Yn 3:2). Koda tesüngmangtsü tajaba! Pauli ashir asenoki taküm nung yimsü asütsü (Rom 5:17). Tsüngremi asenoki taküm nung chuba ama yimsü südaktsüner.

Asenoki tashi angaba aser temeshiba ajanga yimsü asür. Tsüngremi pa sentsüwangshi asoshi asenoki temeshiba nung yimsü südaktsüner. Kechiaser Yisu Khrista nung tamang ajanga asenok pa chirtem lir, asenok kotak nung Khrista den amen. Anungji asenoki tekümtet sopudi. Asenok tepela asoshi ayimtendi.

Kenü tamangertemi Khrista den pa yimli nung yimsü asütsü. Saka tanü pai taküm nung yimsü asütsü na aginer. Nai Khrista den yimsü asür asü? Nai Tsüngrem o nung tashi angadang aser ne mulungjang merüka ayudang,na chuba ka akümer.Taküm nung ne tanelaren teküpbok jenjang nung teli. Chuba ka süang.

India nung Arogotemi FCRA Amendment Bill anema sarasadem

July 01, 2026: Amongnü (June 28) India tesem balala nung Khristan denominations ajaki longjemer 'National Day of Prayer & Fasting' ayongzüka Foreign Contribution (Regulation) Amendment Bill, 2026 anema sarasademogo.

Catholic Bishops' Conference of India (CBCI), National Council of Churches in India (NCCI) aser Evangelical Fellowship of India (EFI)-i züngsem Arogo ajak dang iba Bill anema sarasademtsü ayongzüka liasü.

Centre sorkari iba bill ya taküm March ita nung Parliament nung benoka liasü aser iba Bill ya maneni tzüngluruwa mongpu Parliament nunga benoktsü.

Joint Action Forum on Minorities (JAFM)-i ayongzükba ama denomination balala nung Khristan lakh aikati linük atema sarasademba den

nung ajemdaker campaign sarasadem lenitsü atema ayongzüka agir. Iba Bill ajanga sorkari Arogotem kiojen agiadoktsüa akok, kiojen para ayuba nungi 'income' ishika dang akümtsüa akok,Arogotem aser mission indang shisaliok aser healing ministries nung kongshitsü, aser itemji ajanga Dalit nungertem aser tribal nisungtem aika takoksa angutsü, ta parnoki metetdaksü.

Tamalen-a NCCI-i shidi jaka ajanga MP tem den iba Bill atema tebilemtsü akaba lemsatepogo.

EFI General Secretary Rev. Vijayesh Lal-ia, Khristan lenirtem Arogotem aser lokti tentettemi iba Bill atema tebilemtsü akaba lemsatepa liasü. Iba Bill atema EFI-i Khristan lenirtem, legal tsütsü mongintem aser ketdangsertem den iba Bill atema jembia arudar.

June 28 jakdang JAFM-i

Prayer, Declaration and Thanksgiving," lemsatepa liasü. Iba ya Rev. Robin Paul-i renem. Iba nungji 2022 küm January ita nung Mother Teresa dak sendakba melungtet telok nem tanaben FCRA registration agütsüba atema tenünsang agütsütsü, FCRA Bill anema sarasademtsü, tatok meshia sarasademtsü, linük nung lenirtem aser sorkar ketdangsertem atema sarasademtsü aser Khristan melungtet teloktem aser missions kongshitsüsa ozüng meyanglutsü atema sarasademtsü lemsatepa liasü.

June 28 nü Tamil Nadu kübok Nallumavadi nungho nisung 75,000 adenshia sarasadem. Iba sentongji Pastor Mohan C. Lazarus leniba nung agia liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yinsem

(n) yin agi osettsüset yangludak (smithy, blacksmith's shop, forge)

* Yinsem nung nok o nü yanglur.

Yintem

(n) yin telong (iron block)

* Yintem amshia lenmang nung ali medemyong ao.

OLONG PAITEP # 7552

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S__ _ i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7551 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Illinois, United States nungi ita 16 tain kinü tanur Aarya-i United States nung national parks 63 prong semdanga otsü tasen ka yanglutsü meranger. Aarya'er tsürabur Akshay Sharma aser Aparajita Rai nati anir lai national park 34 tashi semdangogo aser Guinness World Records den osang agitepdar. Akshay aser Aparajita nati national parks 63 prong semdangtsü tebilemba maliasü saka park ranger kati tena nem iba shisatsü agütsü.

Texas nungi Journey ta ser tanur ka pa arishi küm 3 tain asü dang national parks 63 prong semdangba atema Guinness World Record yangluteta liasü.

Aarya-i taruba küm ana tsüngda alizü ng tongtetra lai iba Guinness World Record ajatettsü.

Imphal nung Liangmai Naga civilian 6 atema temeten meshi**Imphal, July 1, 2026**

(Agencies): Imphal West kübok Changanggei Community Hall nung June 30 nü mener lungkak aitba sentong ka ayongzüka agiogo.

Iba sentong ya Justice for the Six Sons of Koubru Joint Committee (J6SKUC) kübok agi aser Liangmai Naga civilian trok pur aoba aser tepsetba atema temeten meshia takhangba agütsüogo.

Iba sentong nung Joint Tribes Council (JTC), AMUCO, COCOMI, Changanggei Apunba Club, Langdai Khangsunaha, RIFPCO Manipur, aser tanga civil society organizations aikati

pusema nungit.

Mener lungkak aitba sentong agiba sülen shilem agirtemi human chain ka yanglu aser temeten meshia yimyim ayim.

J6SKUC ya Joint Tribes Council kübok Naga civilian 6 tepsetba atema temeten bushitsü nüngtem nung tentetba lir. Iba luden ya Rongmei Naga Luphwam, Manipur nung State President Chingdinliu Panmei ajanga ketdangsüa repranger.

Iba ludeni kin shinga anema masü saka shinga tsütsü meshii özü ng benschitsü, aibelenertem pua merenshitsü aser public-i justice system nung tamang

akatsü atema movement tenzü k ta lennirtemi ashi.

Parnoki nisung trok tepsetba nung shilem agirtem aputsü aser özü ng kübok ken o benoka angadangtsü, Suspension of Operations (SoO) agreement meyipa agitsü, Kuki National Front-Presidential (KNF-P) ya terrorist organization ka ama sangdongtsü, Deputy Chief Minister Nemcha Kipgen agientsü aser government o protected land nung özü ng alema yimtsüngtem kuma aliba agientsü takhangbatem agütsüogo.

Lungkak aitertemi "Arrest the Named Killers. Prosecute the Guilty," "End SoO. End the Proxy War" aser "Protect Our Land. Uphold the Law" tezülubatam amer shilem agia liasü.

Parnokisa India aser Manipur sorkartem dang akhangba onüktem asoshi inyaksü mepishi aser temeten mangu tashi özü ngi melaba ama lungkak aittsü metetdaksüogo.

Sharda Devi: Manipur nungi mezü ngbuba tetsür MP**Imphal, July 1, 2026**

(Agencies): Manipur BJP President Adhikarimayum Sharda Devi-i Hombarnü Rajya Sabha nung Member of Parliament (MP) ka ama tezü ngzüktep agiogo.

Manipur nung Rajya Sabha election nung Sharda Devi den tetokteper shinga mali lai takok ngua liasü.

Rajya Sabha Chairman aser Vice President C P Radhakrishnan-i Rajya Sabha Chamber nung MP tenet nem tezü ngzüktep agidakja liasü.

Manipur nungi mezü ngbuba

tetsür MP ji Sharda Devi lir aser lai Manipuri oshi agi tezü ngzüktep agia liasü.

"Nüma atangba, tebilemtsü khuret abenba aser pelaba mapang ka. Member of Parliament, Rajya Sabha inyaksü tezü ngzüktep agiba atema pelar. Manipur aser Bharat tenzü ktsü atema bendanga agütsür" ta Devi-i social media nung lemsatep.

Hombarnü Gujarat, Karnataka, Madhya Pradesh, Maharashtra aser Rajasthan nungi MP tasentemi tezü ngzüktep agiogo.

MP tasentemji Tarun Chugh,

Jitendra Meghji bhai Kanzariya aser Mansingh Meraman Parmar (Gujarat), M Nagaraja (Karnataka), Rajendra Hiralal Jain (Maharashtra), aser Alka Singh (Rajasthan) nunger lir.

Congress president Mallikarjun Kharge-ibo pa balaka Radhakrishnan indang chamber nung tezü ngzüktep agia liasü.

Iba sentong nung Rajya Sabha Deputy Chairman Harivansh, Leader of the House J P Nadda, Parliamentary Affairs Minister Kiren Rijiju aser Law Minister Arjun Ram Meghwal nunger aden.



Meghalaya Chief Minister Conrad K. Sangma-i June 30, 2026 nü 'Achievers of the Month' initiative tenzü ktsüba sentong nung agiba noksa ka angur. Iba maparen ajanga Meghalaya nung sports, arts, entrepreneurship, agriculture, innovation, tourism, education aser social leadership nung tongti shilem agirtem ajiteta tetushi agütsütsü. Kasa sentong nungsa CM Conrad-i CM Connect initiative kübok state tesem balala nungi entrepreneurs 50 den ajurutepa sensaksema liasü.

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND: KOHIMA**

No.DHFW-5/D.Pharm/Part-III/2026**Dated, Kohima the th July' 2026****NOTIFICATION**

With reference to the Letter F.No.11(2)-RIPSAT/2021/SUB-1/ Dated 29/5/26, the following Candidates are selected on 3rd July'2025 to undergo Diploma in Pharmacy (D.Pharm) course at RIPSAT, Agartala for the Academic session 2026. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification. Waiting List will be maintained for a period of 3 (Three) months w.e.f the date of issue of this result.

Selected List

1. L ManngamKonyak
2. Ajingla A
3. Merangthung Y Kithan
4. LanuwatiAo
5. AvlynZaya Kath

Waiting List

1. KhihanleJemu
2. ShejeangNyaknyau B
3. Yangermenla Jamir
4. Maryangla T Imsong
5. Shingmei A Phom

SD/-

DR. MERENINLA SENLEM

Principal Director

Directorate of Health & Family Welfare,
Nagaland: Kohima.



Addis Ababa, July 01, 2026 : Ethiopia yimtiba Addis Ababa nung annual summer cleanup campaign mapang nüburtemi shilem agiba noksa nung angur. Iba summer cleanup campaign nung nisung 750,000 dak tema shilem agir, ta iba yimti mürekmejuba agency ka indang director general Gezahegn Desisa-i ashi.

Yimjung alitsü atema US aser Iran technical jembishinü tenzüker

Doha, Chiteni/July 01 (Agencies): US aser Iran na Bodhbarnü Doha nung technical jembishinü akar, kong parnoki Strait of Hormuz ajanga rong senzüdaktsütsü aser teti atema ceasefire alitsü atema mulungtepsü lenmang bushir, ta iba jembishinü junga meteta alir osang aser Iran ketdangsür temi ashi.

US Tir Donald Trump apang Jared Kushner aser envoy Steve Witkoff nati jembishinü atema 'groundwork' yanglutsü asoshi Qatar indang ato kilonser ajuru, saka sensaksemba nung tena madentsü, ta iba jembishinüba junga meteta aliba osang ajanga ashi.

Qatar ya Pakistan den külemi US aser Iran tetsüngtai ia yimjung ken o jembir.

Jembishinü ya taoba ita 14-point interim accord zülutepba nung amendaka lir, koba US aser Israel nati February ita tatemlen nungi Iran amakba ajanga tenzügba tembangtsü aser Strait of Hormuz tanaben lapoka teti asoshi yimjung tezüngzüktep atema jembitsü anogo 60 atakzüka lir.

Ajisüaka US aser Iran nati

yimjak nung interim pact tetetzü mechi o balala jembir aser iba yongji taoba hopta tayang kepzüktepa kati ka dak maka liasü.

Iran-i iba strait ya azüoka iba tzü lenmang ajanga Gulf-i aitba aser tokoba rong tem dang sen meshitsü temulungtetba nung lir, ta Iran ketdangsür anati Bodhbarnü ashi.

Strait nung rong terabo senzür, kong rara metenzük dang alima nung totzü aser liquefied natural gas shilem 20 shi bena liasü.

Doha nung jembishinü ya chief negotiators aser specialists lemsar senden balala amener, ta osang ajanga ashi. Parnok Mongulbar aonung tenzüker aser Bodhbarnüa maneni jembishinü akar, ta Iran ketdangsüri ashi.

Iran-i temulung agütsüba nung strait ketdangsütsü mulungtepba aser Iran indang rongsen \$6 billion salatsü dena lir ta yimjak nung shia lir, aser tang jembishinüba nung iba onük ana nung rangloksü, ta Iran ketdangsüri ashi.

US-i strait ajanga rong tem talenba makai senzütsü nung temulung agütsür, ta osang

ajanga ashir.

Bodhbarnü Iran indang state media ajanga ashiba agi, bendanger indang container rong ka Strait of Hormuz nung Iran ketdangsüri lateta yutsüba lenmang nung masü tzü tarok masüleni aita tekong nung adoka lir.

Iba rara ajanga Iran nungeri Gulf linüktem nung US mitkar aliba tesem amak aser Iran aser Lebanon nung timba sür nisung meyririjang aika tepsetogo, aser totzü jenjang tali kumdaktsü.

November ita midterm elections metenzük dang rongsenketzüng jenjang mejungi kumer aliba azüoktsü Trump tebilemtsü akar. Iran nung theocratic lenirtem rara nung mesamai jenbua lir, saka rongsenketzüng mejungi akumba ajanga nüburtemi mepelar.

US aser Iran tsüngta interim deal yagi Lebanon nung Israel aser Iran-i yariba Hezbollah telungpur tsüngta rara tembangtsü ashir.

US-i Israel aser Lebanon sorkar tsüngta jembishinü balaka animesoa framework security deal ka yanglu, saka Hezbollah-i magizüker.

Taoba küm Trump-i crypto businesses nungi sen \$1.2bn ajangzük

New York, Chiteni/July 01 (Agencies): US Tir Donald Trump-i taoba küm pa indang crypto businesses nungi sen \$1.2 billion jungnüa ajangzük, ta Mongulbarnü federal filing ka sayaba nung sayu.

Pa US tir akumdang iba business ya tetenzüker ka liasü, saka tangbo pai küm aika bendena aliba dang timba kumogo. Talisa billionaire temi iba business nung sen indokba aser Trump pa sasa iba industry nung federal crackdown agientsü mera agiba ajanga tajangzük ya tali akum.

Pa indang World Liberty Financial business nungi "governance tokens" densema crypto products tasen tem ayokba nungi Trump sen \$500 million dak tema angu, ta Office of Government Ethics ajanga ashi. Ano CIC Digital LLC ta sür crypto business ka nungi pa indang tejak inoka aliba souvenir mesük "meme" coins ayokba nungia sen \$600 million dak tema ajangzükba sayur.

Trump-branded Bibles, sneakers aser tanga oset tilatem taoba küm ayokba nungia pai sen

million aika najangzük, koba tir ka asoshi aiben majangshiba yimya ka alitsü. Trump-branded watches tem kisüng ayokba nungi sen \$4.7 million ajangzük.

Trump-i pa indang senotsü ya par jabaso temi amshir ta ashir, saka inyakyim nung yamaji masür aser pa jakdang US tir inyaka aruba yimya den khenyongi mapeter.

Forbes-i Trump rongsen ya sen \$6 billion lir ta asadangtet, koba 2024 küm \$2.3 billion liasü.

Pai bendang lima nung hotel, resort aser condo deals yangluba nungia sen million aika ajangzük, koba par kibongi iba business tenzüker küm noklang jungnüa arudang rongsen tali akumba tang ama majangshidangi lir.

Item linük ya aika US den tariff, mitkar teyari aser tanga tongtipang inyakyim asoshi jembir, aser par kibong business tezüngzüktep yanglujen yanglur.

Taoba küm United Arab Emirates nung aliba ki o jen nungi Trump business atema sen \$10.4 shi ajangzüka liasü. Saudi Arabia nung par kibong den tesendaktep tajung aliba real estate developer kati yangluba ki o je n nungi tir

indang company dangi sen \$9 million yoka liasü. Bucharest, Romania aser ano Qatar nung ka aliba nungi pa dangi sen \$5 million (each) yoka liasü.

US nung par rongsen tejangja rongnung Florida nung aliba Mar-a-Lago ya ka lir, koba taoba küm kanga inogo.

Iba property nungi Trump sen \$77 million angu, koba pa küm ka tejakdang senso ka dang asüba mapang anguba dang shilem 50 agi timba anguba alitsü, kechiaser linük balala lenirtem aser shishilempartem yangji adenshir.

Iba report nung revenue kisüng aser tajangzük anguba mesayur, anungji pai kwi aazüker, aji memeteter.

Trump-i pa indang business ya par jabaso temi ketdangsüba trust ka nem ketdang südaktsür aser telemtetba agiba nung madener, anungji tim masüba inyakba mali, ta White House-i aiben shia arur.

Trump'er company, Trump Organization-i bendang lima nung business inyakba ya sorkar den masü private company tem den inyaker, ta ashir.

Russia-i Ukraine nung nisung asem tepset

Kyiv, Chiteni/July 1 (Agencies): Russia-i southeastern Ukraine nung tesem balala amakba sülen nisung asem tepset aser nisung aika yirutsüogo. Kasa mapang nung Kyiv-ia arrtsü nungi km 1,300 shi pilar Russia indang oil refinery ka makogo.

Russia-i Bodhbbar anepdang Dnipropetrovsk tesem amakba sülen petrol station pongu raksatsü aser tetsür ka tepseta liasü, ta Governor Oleksandr Hanzha-i ashi.

Tanga tatalokba ka nung Mongolbar aonung menor Zaporizhia tesem yimtiba Zaporizhzhia amakba sülen nisung ana tepsetogo, ta Ukraine nung media sangdong balala ajanga metetdaktsüogo.

Ukraine tir Volodymyr Zelenskyy-i ashiba agi, Ukraine-i southern Russia kübok Ufa nung oil refinery ka makogo. Paiza, iba tesem ya Russia Penza region nung Russia indang military-industrial complex indang tongtibang

facility ka liasü, ta shisem.

"Item ajak ya Russia-i onok anema jenjang agiba atema telangzüba agütsübatem lir. Yimjung nüngdaker aser iba ya Russia nunger lenirtemi angatettsüla," ta pai X nung zülutsü.

Anogo ka tejakdang Russia-i, parnoki Ukraine-i yokba drone 419 Moscow temeket densema linük kübok tesem balala nung khazüka yokogom ta ashi. Ketdangsürtemi ashiba agi, iba mapang ita trok kinü tanur ka tepseta liasü.

Ita ishika Kyiv-i drone amshia Russia kübok tongtibang tesem balala maka arudar. Linük ana tsüngda rara tenzüker küm pezü ser tesadang aoer, saka tang tashi rara tembangtsü asoshi tenangzüktepba meyangluteti arudar.

US teyongtsüi ia yimjung atema sensaksema arudar, saka US-Israel nati Iran amak tenzügba sülen iba sensaksem ya bangdaka lir.

Afghanistan-i yokba drone 4 Pakistan-i khadangogo



Islamabad, Chiteni/July 1 (Agencies): Afghanistan nung Taliban sorkari anüng ajanga Pakistan kübok tesem kar makogo, ta ashir aser kasa mapang nung Islamabad-ia, parnoki Balochistan province nung rudimentary drone pezü khazüka yokba osang agütsüogo.

Iba hopta tetenzüklen Pakistan-i anüng ajanga Afghanistan anütoklen tesem kar amakba atema telangzüba tapet agütsütsü ta Taliban sorkari nangzügba sülen tang kidanger ana tsüngda tensa mejungi kümogo.

Pakistan military-i Bodhbarnü ashiba agi, Afghan Taliban sepaitemi arrtsü adena Balochistan-i rudimentary drone pezü yok. Item drone tem ya Pakistan indang air defence network-i kara kara puteta liasü.

"Afghan Taliban-i Pakistan maneni rongshira, parnok nem telangzüba tapet agütsütsü, koba parnok asoshi takoksa tulu asütsü," ta military-isa shisem.

Kasa mapang nung Afghan defence ministry-i X ajanga parnoki Balochistan aser northwest Khyber Pakhtunkhwa province anüng ajanga amakba aser iba mapang

ISIL (ISIS) den sendaktepba aliba züngsemtem kar tepsetogo, ta metetdaktsü.

Taliban military ket nung fighter jets mali aser parnok indang air force-a kanga junga inyaksangshi masür, saka parnoki Pakistan den raratsü atema drone tilalatem amshia arudar aser arrtsü nung tongtibang tesemtem makdar.

2021 küm Taliban-i sorkar atsüngba sülen Pakistan aser Afghanistan na tesendaktep mejungi arudar. February ita nungi raratep tenzügba sülen nisung noklang aika tepsetogo.

Hopta tatemi Karachi amakba sülen Pakistan-i Afghanistan anütoklen tesem kar maka nisung aika tepsetogo. Islamaba-i ashiba agi, parnoki telungpur amak, saka Afghan sorkari ashiba agi civilian 36 tepsetogo.

Taliba sorkari Pakistan kübok tesem balala amakba telungpur teloktem aser talisa Pakistan Taliban pur jenokdaktsüba atema Afghanistan aija arudar, ajisüaka Afghanistan-i iba taitsüba magizüker aser iba ya Pakistan telung ken o ka ta shia arudar. Ajisüaka rara ya iba ajanga tenzügba lir.

World Cup: Norway, France, Mexico round of 16-i iogo



Mexico asayartem goal tanabuba idaktsür pelateper.

Chiteni/July 1, 2026

(Agencies): Mongolbarnü Texas nung Norway-i goal 2-1 agi Ivory Coast koka parnok FIFA World Cup round of 16 tongtetogo.

Atakzükja aliba asaya mapang tembangba aruba mapang minute 86buba nung Patrick Berg-i ball agütsüba Haaland-i idakja parnok asaya akok. Haaland asoshi iba goal ya taküm Word Cup nung goal 5buba liasü. Parnok round of 16 nung Deobarnü New Jersey nung Brazil den asayatsü.

Asaya ya mapang talangba ka Ivory Coast-i amokbanger asaya saka asaya mezüngbuba shilem tembangtsü lia Antonio Nusa-i mezüngbuba goal idaktsü. Ajisüaka break sülen Ivory Coast-i goal idaktsütsü atema nongshia asaya aser minute 74buba nung Amad Diallo-i goal ka idakja goal kasasa aküm.

Iba goal idaktsüba sülen

asaya melenshi aser Norway-ia attack asü tenzük aser asaya atemtsü lia Haaland-i tanabuba goal idakja parnok asaya akok. Tanga asaya ka nung France-i goal 3-0 agi Sweden kokogo.

Asaya nung Kylian Mbappe-i goal ana idaktsü aser Michael Olise-ia maneni ball kanga junga yangluja asayaogo. Iba asaya akokba sülen parnok round of 16 nung Paraguay den asayatsü.

Asaya tetenzük nungi Didier Deschamps-i aniba team yagi asaya amokbanger asaya aser asaya mezüngbuba shilem tembangtsü lia Mbappe-i mezüngbuba goal idakja parnok tejakdang aküm.

Asaya tanabuba shilem tenzük minute tibuba nung Olise-i ball tajung ka agüja Bradley Barcola-i tanabuba goal idaktsü aser minute 74buba nung Mbappe-i tasembuba goal

idakja parnok asaya akok.

Asaya nung goal ana idaktsüba sülen taküm iba asayamung nung Mbappe-i ajak senteper goal trok idaktsüogo aser Lionel Messi den kasasa kümogo.

Maneni Mexico City kübok Azteca Stadium nung Mexico aser Ecuador na asaya Mexico-i goal 2-0 agi kokogo. Parnok taruba round nung England mesüra DR Congo den asayatsü.

Asaya tetenzük nungi Mexico-i goal idaktsütsü atema attack süa asaya aser minute 22buba nung counterattack asüba mapang Julián Quiñones-i parnok atema mezüngbuba goal idakja liasü.

Iba sülen minute teku dang lir Jiménez-i Mexico atema tanabuba goal idakja parnok asaya koka liasü.

Asaya nung Piero Hincapié nem tebang nembanger jembiba ajanga red card ka agüja liasü.

Ronald Koeman-i Netherlands coach mapa toktsüogo



Chiteni/July 1, 2026

(Agencies): FIFA World Cup nung tsükatokba sülen Ronald Koeman-i Netherlands coach mapa toktsüogo.

Dutch team ya Round of 32 nung Morocco den penalty metsütepba makokba sülen asayamung nungi tsükogo. Iba asaya nung Justin Kluivert, Quinten Timber aser Crysencio Summerville nungeri penalty magütsüteti liasü.

Asaya makokba sülen

asayartem online ajanga kanga mezüngmeshi meso aser Royal Dutch Football Association (KNVB)-i, penalty metsüpetba asayar asem ya social media nung nüburtemi kanga mezüngmeshia liasü, ta ashi.

Koeman shiba indang contract iba asayamung sülen tembangtsü liasü, pai Instagram ajanga iba mapa toktsüba lemsatetepogo, aser ashiba agi pa joko manager

mapa kecha nunga minyaktüsü akok.

"Kü indang career lepareprangshiba mapang ni kanga nema danga bilemer. Ni yanglushitsüba club aser nisungtem den inyakogo aser tajangshiba tajung aika lir, koba taküm tepeyong mamatsü," ta Koeman-i zülutsü.

Arishi küm 63 tain coach yagisa, kibong nung timtem aliba ajanga football ya kangabo tongtibang mesüi aküm, ta ashi.

Koeman kinungtsü Bartina breast cancer putetba sülen tang temang anepaluba mapang ka lir, aser iba ajanga pai iba telemtetba agi asütsü ta bilemer.

Koeman ya 2018 küm Netherlands coach aküm aser pai national team asüingsashija asayamung tongtibangtem nung toktepba asayatetsüsa renemtsü, ajisüaka pa tanaben national team-i meyipa aruba sülen mezüng ama junga minyaktet aser tang pai mapa toktsüogo.



TESÜSABA ASAYA OSANG

Mexico	2	0	Ecuador
France	3	0	Sweden
Côte d'Ivoire	1	2	Norway

JULY 1 & 2 NÜ SAYATSÜPUR

9:30 PM	England	VS	DR Congo
1:30 AM	Belgium	VS	Senegal
5:30 AM	USA	VS	Bosnia and Herzegovina

JULY 3 NÜ SAYATSÜPUR

12:30 AM	Spain	VS	Austria
4:30 AM	Portugal	VS	Croatia
8:30 AM	Switzerland	VS	Algeria
11:30 PM	Australia	VS	Egypt

Gulveer Singh-i otsü tasen ka yangluogo



Chiteni/July 1, 2026

(Agencies): India nunger long-distance runner Gulveer Singh, shiba 10000m sprint nung Asian champion lir pa ya India nunger teburtem rongnungi one-mile pro minute pezü majungdang asemzükba mezüngbuba asayar kümogo.

United States nung 24buba Music City Track Carnival nung asemba mapang Gulveer-i alizüng 3:55.63 nung tongteta liasü. Pa sülen Christopher Knight aser Tristan Trevino na tanabuba aser tasembuba jenjang nung liasü.

Tebur professional mile ya track & field's marquee middle-distance events rongnung ka lir, aser asemtepertemi minute pezü majungdang asemzüktsü meranger, koba Gulveer-i Bodhbarnü ajanzüksetogo.

Iba asemtepba nung world record ya Hicham El Guerrouj-i 1999 küm yanglua lir. Pai alizüng 3:43.13 nung tongteta liasü. Temaba jenjang nung

tokteptsü atema asayartemi lap ka second 55 nung asemzüktsü nüngdaker.

Maneni Gulveer ya 5,000 metres nung reigning Asian champion lir. Pai 2025 küm Asian Championships nung gold medal ngua liasü. Ano pai 2022 Asian Games nung 10,000 metres nung bronze medal aser 2023 Asian Championships nung 5,000 metres asemtepba nung bronze medal ngur lir.

Taküm küm tetenzüklen Gulveer ya Tallahassee nung 2026 World Cross Country Championships nung 40buba nung tembanga liasü.

Taoba hopta Bhubaneswar nung Gulveer-i 13:39.18 nung alizüng tongtettsü nüngdaka liasü, koba Asian Games nung 5,000 metres asemtepba atema Athletics Federation of India-i atakzuka toktsüba qualifying standard lir.

Asemtepba nung Gulveer ajak dang tejakdang liasü, sakai pai alizüng 13:52.92 nungang tongteta liasü.

BILEMDANGANG

"Nü ket nung kechi ali aji tajungtiba amshitsü merangang."